

BOSNA I HERCEGOVINA
FEDERACIJA BOSNE I HERCEGOVINE
PARLAMENT FEDERACIJE
DOM NARODA
Broj: 02-02-8-1630/15
Sarajevo, 26.11.2015. godine

Z A P I S N I K
**Šeste sjednice Doma naroda Parlamenta Federacije Bosne i
Hercegovine, održane 26. novembra 2015. godine**

Sjednica je počela u 14 sati i 45 minuta.

Sjednicom je predsjedavala Lidija Bradara, predsjedavajuća Doma naroda Parlamenta Federacije BiH.

Na početku sjednice predsjedavajuća je pozdravila prisutne delegate, predsjednika Federacije, Marinka Čavaru, potpredsjednika Federacije Milana Dunovića, prisutne ministre, predstavnike medija, predstavnike međunarodne zajednice i goste.

Izostanak sa sjednice opravdao je Aner Žuljević.

Na osnovu evidencije Stručne službe, predsjedavajuća je konstatovala da sjednici prisustvuje 49 delegata, što čini većinu, te Dom naroda može raditi i punovažno odlučivati.

Predsjedavajuća je obavijestila delegate da preuzmu vrpce u znak podrške obilježavanja 16 dana aktivizma protiv nasilja nad ženama.

Predsjedavajuća je, na osnovu člana 104. Poslovnika o radu Doma naroda Parlamenta Federacije BiH, pozvala delagete da, ukoliko žele, postave delegatska pitanja i pokrenu inicijative, i obavijestila Dom da će do sljedeće sjednice dobiti pisane odgovore na inicijative i pitanja koja su upućena rukovodstvu Doma naroda.

Delegatska pitanja i inicijative

Željko Josić postavio je pitanje vezano za dodjelu donacija poplavljenim područjima za sanaciju posljedica poplava. Upitao je šta je sa 17 nedostajućih traktora za poplavljeno područje Posavskog kantona koji je donirala Narodna republika Kina.

Željko Mirković pokrenuo je incijativu i postavio delegatsko pitanje.

Pokrenuo je inicijativu za izmjenu i dopunu propisa iz oblasti turizma, ugostiteljstva, preduzetništva i obrta s ciljem jačanja turizma.

Delegatsko pitanje uputio je Komisiji za koncesije Federacije Bosne i Hercegovine u vezi procijenjenog godišnjeg gubitka koncesionih naknada za 2014. godinu i ukupnim gubicima od donošenja Zakona o koncesijama 2002. godine do danas, kao posljedice nekonzistentne implementacije ovog Zakona.

Mladen Lonić postavio je pitanje Mladenu Ivaniću, članu Predsjedništva Bosne i Hercegovine, potpredsjedniku Federacije Bosne i Hercegovine Milanu Dunoviću i federalnom ministru rada i socijalne politike Vesku Drljači, a koje se odnosi na nedostatak doktora u ambulancama u mjesnim zajednicama Radić i Jesenica u općini Bosanska Krupa. Zatražio je da se osiguraju sredstva za doktore u ovim ambulancama.

Postavio je pitanje zašto doktorica srpske nacionalnosti nije upućena na specijalizaciju koju je dobila nakon provedenog konkursa.

Segmedina Srna Bajramović postavila je pitanje vezano za donošenje Odluke iz oblasti revizije boračke populacije kojom se daje saglasnost federalnom ministru za donošenje Pravilnika o formiranju i radu revizorskih timova, donošenje Pravilnika o načinu i postupku vršenja revizije i usvojenoj Informaciji o reviziji za treći kvartal 2015. godine.

Utvrđivanje dnevnog reda.

Predsjedavajuća je obavijestila delegate da je Kolegij Doma naroda predložio da u dnevni red, kao tačke četiri i pet, budu uvrštene:

- Izjašnjavanje Doma naroda Parlamenta Federacije Bosne i Hercegovine o Amandmanu kojeg je usvojio Predstavnički dom Parlamenta Federacije Bosne i Hercegovine na Prijedlog zakona o izmjeni i dopuni Zakona o eksproprijaciji,
- Izbor i imenovanja:
Prijedlog odluke o izmjenama Odluke o izboru predsjednika, zamjenika predsjednika i članova radnih tijela Doma naroda Parlamenta Federacije Bosne i Hercegovine.

Budući da nije bilo prijedloga za izmjenu i dopunu dnevnog reda, predsjedavajuća je konstatovala da je Dom naroda Parlamenta Federacije Bosne i Hercegovine, sa 39 glasova za i sedam suzdržanih glasova, usvojio sljedeći

DNEVNI RED

1. Nacrt budžeta Federacije Bosne i Hercegovine za 2016. godinu,
2. Nacrt zakona o izvršavanju Budžeta Federacije Bosne i Hercegovine za 2016. godinu,
3. Dokument okvirnog budžeta Federacije Bosne i Hercegovine za period 2016. - 2018. godina,
4. Izjašnjavanje Doma naroda Parlamenta Federacije Bosne i Hercegovine o Amandmanu kojeg je usvojio Predsavičnički dom Parlamenta Federacije Bosne i Hercegovine na Prijedlog zakona o izmjeni i dopuni Zakona o eksproprijaciji,
5. Izbor i imenovanja:
 - Prijedlog odluke o izmjenama Odluke o izboru predsjednika, zamjenika predsjednika i članova radnih tijela Doma naroda Parlamenta Federacije Bosne i Hercegovine.

1. Nacrt budžeta Federacije Bosne i Hercegovine za 2016. godinu

Nacrt budžeta utvrdila je Vlada Federacije.

Nacrt budžeta razmatrala su nadležna radna tijela koja su dostavila svoje izvještaje.

Nacrt budžeta obrazložila je Jelka Milićević, federalna ministrica finansija.

U raspravi su učestvovali: Predrag Kojović, Mile Marčeta, Mirvet Beganović, Sejo Bukva, Drago Puzigaća, Ivo Tadić, Željko Mirković, Sanel Mušović, predsjednik Kluba delegata hrvatskog naroda Tomislav Martinović, Željko Josić, Refik Poparić, predsjednik Kluba delegata srpskog naroda Slaviša Šućur, Anes Osmanović, Damir Jukić, Admir Hadžipašić, Draženka Subašić, Rasim Kantarević, predsjednik Kluba delegata bošnjačkog naroda Osman Ćatić, Lidija Bradara, Mustafa Kurtović, Jasenko Tufekčić i premijer Fadil Novalić.

Na osnovu rezultata glasanja, predsjedavajuća je konstatovala da je Dom naroda Parlamenta Federacije BiH, s 30 glasova za, dva protiv i osam suzdržanih, usvojio slijedeći

ZAKLJUČAK

1. Dom naroda prihvata Nacrt budžeta Federacije Bosne i Hercegovine za 2016. godinu i smatra da može poslužiti kao osnov za izradu prijedloga budžeta.
2. Zadužuje se Vlada Federacije Bosne i Hercegovine da, prilikom izrade prijedloga budžeta, ima u vidu sugestije, primjedbe i prijedloge iznesene na sjednici Doma naroda, kao i one koje će biti dostavljene u pisanoj formi.

2. Nacrt zakona o izvršavanju Budžeta Federacije Bosne i Hercegovine za 2016. godinu

Nacrt zakona utvrdila je Vlada Federacije.

Nacrt zakona razmatrala su nadležna radna tijela koja su dostavila svoje izvještaje.

Na osnovu rezultata glasanja, predsjedavajuća je konstatovala da je Dom naroda Parlamenta Federacije BiH, s 31 glasom za i 11 suzdržanih, usvojio slijedeći

ZAKLJUČAK

Dom naroda prihvata Nacrt zakona o izvršavanju Budžeta Federacije Bosne i Hercegovine za 2016. godinu i smatra da može poslužiti kao osnov za izradu prijedloga zakona.

3. Dokument okvirnog budžeta Federacije Bosne i Hercegovine za period 2016. - 2018. godina

Vlada Federacije Bosne i Hercegovine dostavila je, radi informiranja, Parlamentu Federacije Dokument okvirnog budžeta Federacije Bosne i Hercegovine za period 2016.- 2018. godine.

Dokument su razmatrala nadležna radna tijela koja su dostavila svoje izvještaje.

U raspravi je učestvovao Muhamed Kozadra.

S obzirom da se radi o materijalu koji je dostavljen Parlamentu Federacije radi informiranja, predsjedavajuća je konstatovala da je Dom naroda Parlamenta Federacije **primio k znanju** Dokument okvirnog budžeta Federacije Bosne i Hercegovine za period 2016. - 2018. godina.

4. Izjašnjavanje Doma naroda Parlamenta Federacije Bosne i Hercegovine o Amandmanu kojeg je usvojio Predstavnički dom Parlamenta Federacije Bosne i Hercegovine na Prijedlog zakona o izmjeni i dopuni Zakona o eksproprijaciji

Predsjedavajuća je podsjetila delegate o sljedećem:

Dom naroda Parlamenta Federacije Bosne i Hercegovine je na Trećoj sjednici 8.10.2015. godine, usvojio Prijedlog zakona o izmjeni i dopuni Zakona o eksproprijaciji sa dva amandmana koja je Vlada Federacije prihvatila na sjednici Doma naroda, pa su postali sastavni dio Prijedloga zakona.

Amandman I.

U Prijedlogu zakona o izmjeni i dopuni Zakona o eksproprijaciji dodaje se novi član 1. koji glasi:

Član 1.

U Zakonu o eksproprijaciji („Službene novine Federacije BiH“, br. 70/07, 36/10 i 25/12) u član 3. iza riječi: „saobraćajne infrastrukture,“, dodaje se riječi: „poslovnih i industrijskih zona,“.

Postojeći čl. 1., 2., 3. i 4. Prijedloga zakona postaju čl. 2., 3., 4. i 5. Prijedloga zakona.

Amandman II.

Član 3. Prijedloga zakona o izmjeni i dopuni Zakona o eksproprijaciji mijenja se i glasi:

„U član 45. st. (4) i (5) mijenjaju se i glase:

(4) Iznimno od stava (2) ovoga člana za bespravno izgrađene stambene objekte za koje nadležni organ nije donio pravomoćno rješenje o uklanjanju, a koji predstavljaju jedinu stambenu jedinicu graditelja i članova njegove uže porodice (supružnici i djeca), graditelju odnosno njegovom pravnom sljedniku pripada pravo na naknadu u visini građevne vrijednosti toga objekta.

(5) Pravo na naknadu iz stava (4) ovoga člana pripada samo u slučaju da je bespravno izgrađeni stambeni objekat evidentiran na službenom orto-foto snimku teritorija Federacije Bosne i Hercegovine u razmjeri 1:5000 koji je uradila Federalna uprava za geodetske i imovinsko pravne poslove.“.

Predstavnički dom Parlamenta Federacije Bosne i Hercegovine je na 10. Vanrednoj sjednici 23.10.2015. godine, usvojio Prijedlog zakona o izmjeni i dopuni Zakona o eksproprijaciji sa Amandmanom II. kojeg je Vlada Federacije prihvatila na sjednici Doma naroda, pa je postao sastavni dio Prijedloga zakona. Tom prilikom, Predstavnički dom izglasao je Amandman kojim je brisao Amandman I. koji je Vlada Federacije prihvatila na sjednici Doma naroda.

U slučaju da Dom naroda usvoji Amandman Predstavničkog doma, Prijedlog zakona o izmjeni i dopuni Zakona o eksproprijaciji bit će usvojen u istovjetnom tekstu u oba doma Parlamenta Federacije Bosne i Hercegovine.

U slučaju da Dom naroda ne usvoji Amandman Predstavničkog doma, različito usvojeni Prijedlog zakona o izmjeni i dopuni Zakona o eksproprijaciji bit će upućen Zajedničkoj komisiji za usaglašavanje različito usvojenih tekstova zakona, koje će domovima dostaviti Prijedlog za rješenje spornih pitanja u Prijedlogu zakona o izmjeni i dopuni Zakona o eksproprijaciji.

U raspravi su učestvovali: Jasenko Tufekčić, Admir Hadžipašić i Tomislav Martinović.

Na osnovu rezultata glasanja, predsjedavajuća je konstatovala da Dom naroda Parlamenta Federacije Bosne i Hercegovine **nije usvojio** Amandman koji je izglasao Predstavnički dom, a koji se odnosi na brisanje Amandmana I. kojeg je Vlada Federacije prihvatila na sjednici Doma naroda, jer su za glasala dva delegata, šest delegata je bilo suzdržano, a 31 protiv.

Prema tome, Prijedlog zakona o izmjeni i dopuni Zakona o eksproprijaciji bit će dostavljen Zajedničkoj komisiji za usaglašavanje različito usvojenih tekstova zakona u oba doma Parlamenta Federacije Bosne i Hercegovine.

5. Izbor i imenovanja:

- **Prijedlog odluke o izmjenama Odluke o izboru predsjednika, zamjenika predsjednika i članova radnih tijela Doma naroda Parlamenta Federacije Bosne i Hercegovine**

Komisija za izbor i imenovanja Doma naroda utvrdila je Prijedlog odluke o izmjenama Odluke o izboru predsjednika, zamjenika predsjednika i članova radnih tijela Doma naroda Parlamenta Federacije Bosne i Hercegovine, kojom je predloženo da u Komisiju za informiranje, umjesto Davora Pehara, bude izabran Dario Pušić, a u Odbor za denacionalizaciju i

privatizaciju, umjesto Nikole Simića, za predsjednika Odbora izabere Drago Puzigaća.

U raspravi nije niko učestvovao.

Na osnovu rezultata glasanja, predsjedavajuća je konstatovala da je Dom naroda Parlamenta Federacije Bosne i Hercegovine sa 36 glasova za i četiri suzdržana glasa, donio Odluku o izmjenama Odluke o izboru predsjednika, zamjenika predsjednika i članova radnih tijela Doma naroda Parlamenta Federacije Bosne i Hercegovine, kojom je u Komisiju za informiranje umjesto Davora Pehara izabran Dario Pušić, a u Odbor za denacionalizaciju i privatizaciju, umjesto Nikole Simića za predsjednika Odbora izabran Drago Puzigaća.

Sjednica je završena u 17 sati i 50 minuta.

Transkript sjednice čini sastavni dio Zapisnika.

SEKRETAR

Izmir Hadživdić

PREDSJEDAVAJUĆA

Lidija Bradara